

KIA HAUMARU TE EKE PAHIKARA

HE ARATOHU MĀ TE KAIKO

He waka eke noa

(Ko tātau katoa ērā e eke ana i tēnei waka)

E whakamārama ana tēnei aratohu i ngā ture me ngā tikanga eke pahikara. Tāpiri atu ki tērā, kua whakaputahia mai e te Ratonga Hautu Waka o Aotearoa ētahi rauemi hei whakamahi i roto i ō koutou kura. Ka taea e te kaiako te whakamahi ēnei rauemi, ēnei hōtaka ako i roto i ō koutou akomanga hei ako i ngā tamariki me pēhea te eke i ō rātau pahikara kia tika, kia haumaru hoki.



E whāi ana ēnei rauemi i ngā taumata 3-5 o te Aho Arataki Marau mo te Ako i Te Reo Māori – Kura Auraki, mē ngā tikanga o te SOLO Taxonomy. He rauemi hei whakamahi i roto i ngā akomanga reo Māori, rūmaki reo, mō te kura whānui ano hoki.

Kua waihangatia ētahi akoranga e whakawhanake ana, e honohono ana, e whakawhānui ano i ngā māramatanga o te ākonga. Me mōhio ano hoki ngā ākonga ki nga ara reo o Te Reo Māori.

Te mōhio ki ngā momo ara reo

Ko ēnei ngā ara reo

• whakarongo – listening		He tohu mō te taringa
• pānui – reading		He tohu mō te pukapuka
• mātakitaki – viewing		He tohu mō te pouaka whakaata
• kōrero – speaking		He tohu moko kauae
• tuhituhi – writing		He tohu mo ngā momo taputapu tuhi
• whakaatu – presenting.		He tohu i te tihi o tētahi maunga hei ātāmira mo te whakaatu

•

Ngā Akoranga

E whai ake nei ko ngā akoranga kua tuhia mā te kaiako. Atu i ērā ko tētahi pepa whakamārama mē ngā kōrero mō te SOLO Taxonomy anō hoki ētahi kōrero kua tāpirihia ake. Anei e whai ake nei ngā whakamāramatanga mō ēnei mahi.

1. Te Ratonga Hautū Waka - Kia haumaruru te Eke Pahikara, kia harikoa hoki

Ko tēnei te pepa e whakamārama ana i ngā tino ngako o ngā hiahia a Te Ratonga Hautū Waka e haumaruru ai, e harikoa ai, e ako anō hoki ai ngā ākonga ki te eke pahikara. Kei roto anō hoki i tēnei ko te whakanui i te:

- taha tinana
- taha wairua
- taha hinengaro
- taha whānau

hei ōrangatonutanga mō te whānau, hapū, iwi o te ākonga

2. He aha ngā mōhiotanga o te ākonga mo te eke pahikara

He pepa tēnei e uiui ana i te ākonga mō ōna mōhiotanga ki te eke pahikara. Ko ētahi momo pātai ko ēnei e whai ake nei:

- He aha te kaieke pahikara?
- He aha te pahikara?
- ko wai atu anō ētahi kaihautū i runga rori?
- He aha te take ka eke pahikara ngā kaieke pahikara?
- He aha ō mōhiotanga mō ngā wāhanga o te pahikara?
- He aha te tikanga o te haumarutanga ka eke pahikara ana koe?

3. Rauemi Marautanga ki te tautoko i te Akoranga 1 - Pūkenga Eke Pahikara

Ko tēnei te tīmatanga o ngā akoranga e aro atu ana ki te tō mai ngā hapori ki roto i te kaupapa, ki ngā akoranga i roto i te akomanga mē te aro atu ki te whakapakari i ngā pūkenga matua. Kō ēnei ko te:

- whakaaro
- whakamahi i te reo, ngā tohu mē ngā kupu
- rangatiratanga
- pāhekoheko
- mahitahi

4. Rauemi Marautanga – Tautoko i te Akoranga 2 - Pūkenga Eke Pahikara

Ko tēnei te hōtaka ako tuarua e titiro ana ki te eke pahikara. Ko ngā pukenga o te whakaatu o te ākonga ki te tīmata, ki te tū, ki te haere i runga i tana pahikara kei te tirohia i roto i tēnei akoranga.

5. Rauemi Marautanga – Tautoko i te Akoranga 3 – Pūkenga Eke Pahikara

Ko tēnei te akoranga tuatoru e titiro ana ki ngā mōhiotanga o te ākonga ki ngā nekenekehanga o te pahikara, arā, te whakamahi o ngā taputapu o te pahikara.

6. Rauemi Marautanga – Tautoko i te Akoranga 4 – Pūkenga Eke Pahikara

Ko tēnei te akoranga tuawhā e titiro ana ki te tiroiro a te ākonga ki tōnā taiao i te wā e eke pahikara ana ia – ko te whakaatu mē pēhea tana titiro haumaruru ki mua, ki ngā taha, ki muri anō hoki mē te whakatūpato i ā ia anō i te wā kei te eke ia i tana pahikara.

7. Rauemi Marautanga – Tautoko i te Akoranga 5 – Pūkenga Eke Pahikara

Ko tēnei te akoranga tuarima e titiro ana ki te mōhio o te ākonga ki te tohu kei te huri māui, huri matau, kei te tū ia i te wā kei runga ia i tana pahikara.

8. Rauemi Marautanga – Tautoko i te Akoranga 6 – Pūkenga Eke Pahikara

Ko tēnei te akoranga tuaono e titiro ana ki te mōhio o te ākonga ki te whakatū ohorere i tana pahikara pēnā he raru e ahu mai ana, kua pā rānei ki a ia. E titiro ana ki te āhua o te rori, te taiao, te huarere mē te koi o te hinengaro o te kaieke pahikara.

9. Rauemi Marautanga – Tautoko i te Akoranga 7 – Pūkenga Eke Pahikara

Ko tēnei te hōtaka ako tuawhiti e titiro ana ki ngā wero me ngā āheinga o te kaieke pahikara i roto i tōna hapori. Ko āna mahi ko te:

- mahere
- waihanga
- whakaaro
- rangahau

10. SOLO Taxonomy – Pepa Whakamārama

Ko te pepa whakamutunga o ēnei rauemi ko te whakamārama i tēnei mea te SOLO Taxonomy. He tapaono te hanga, ā, i roto i tēnei taura tekau ngā tapaono kua whakamahia hei whakaatu i ngā akoranga eke pahikara.